



Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 7 Yangia anidakangma : Tir Yimym tir_yimym

tir yimym TAPAK 3

Indonesia anentsiuh lendong nung nisung 16 asü

Sorkari Sanjay tasiiba agi merenshitsü akhangtsü: Mamata



VOL. XXII ISSUE NO. 98 (ADOK 98) DIMAPUR RASEMNÜ (WEDNESDAY) AENJETI (JANUARY) 22, 2025 ₹ 5.00

NSCN/GPRN-i osang tejangja meshir

Dimapur, January 21, 2025. (TYO): NSCN/GPRN-i Aolemba aser bangdakpur dang Ministry of MSME Government of India (GOI) kübok MSE-CDP scheme inyaka aruba indang osang Naga nunger den lemsateptsü metetdaksüogo.

NSCN/GPRN-isa Aolemba Longkumer dang iba scheme atema work order agütsüba sülen mapang züngzüksüba aser tang tashi merenemba osang jangjashitsütsü aser osettsüset aliba indang cash voucher/ invoice agütsütsü tetuyuba agütsüogo.

"Aolemba-i print media ajanga NSCN-i asüngdanga senotsü maparen nung pai shilem magi ta shiogo anungji iba project/ scheme nung pai shilem magi nungbo kechiba sanctioned amount received slip nung pai sign asü" ta MIP, NSCN/GPRN

(Khango-Hokato Vusshe)-i jnauary 20, 2025 nü sangdong ka nung asüngdanogo.

Naga nunger tarutsü putu asoshi terenlok bener arutsü atema bangdak department dang civil works aser technical machineries osang tejangja agütsütsü metetdaksür, ta parnokisa ashi.

NSCN/GPRN-isa print media aser TV channels nung taoba mapang ashiba nung masetshii noktaka lir aser Department ajanga agütsüba DPR/work order ama contractors aser suppliers ajaki mapa inyaksü metetdaksür ta MIP sangdong nungsa shia lir.

Bangdak nisung aser Department ajanga iba scheme indang osang tejangja magütsüra onoki mapa inyaksü. Kija shinga nem-a tiyazü jembia Naga public mekulakokdaksütsü ta MIP, NSCN/GPRN-isa ashi.

BAN-i NSCN (Khango-Hokato Vusshe) aitsür CFC Wooden Furniture Cluster, Toluvi maparen shitak dang inyakdar

Dimapur, January 21, 2025 (TYO): NSCN/GPRN (Khango-Hokato Vusshe)-i Special Purpose Vehicle (SPV) Chairman Aolemba dang Rs 50 lakh meshiba aitsür ta Business Association of Nagas (BAN)-i metetdaksüogo.

"Aolemba-i furniture cluster atema CFC ketdangsuba atema sen meshiba aitsür aser iba ajanga sorkari law & order mapa shitak meinyaktetba sayur. Talisa sorkari iba onük atema ola madokba angudang shisabulur kechiyong sorkari pei senso kümzüke meyuteter ama ajiteter" ta BAN-i ashi.

Sorkari ketdangsubaren shitak meinyaktetba ajanga NSCN/GPRN (Khango-Hokato Vusshe) nem parnok sünüsü süa inyakdaksür aser sensotem lendongbang nung alir ta parnokisa ashi.

"Sorkari mapa meinyakba aser ola madokba ajanga ibala telok tali tasü itdaksür aser ozüng alema mapa inyaksangshir. Sorkari pa tashi sayutsüla aser aibelenertem anema bushisüngdanga merenshitsüla. Yamaji asü nung dang sensotemi sorkar dak tamang akatsü" ta BAN-isa metetdaksü.

"NSCN/GPRN (Khango-Hokato Vusshe)-i tashiyim agi sen meshiba nung tamakok anguba agi parnok tenüng memenütsü asoshi moral policing inyaker saka iba ajanga parnok chichiba tebilemba sayur. Nisung kari telok tenüng amshia

pei ajanzüktsü asoshi tashiyim agi sen meshiba onoki jungjunga meteta lir" ta BAN-isa ashi.

Ibala mapa inyakertem yimjak nung metetdaksütsü aser Naga nunger aser terenlok tenüng amer pei ajanzüktsü merangertem mapang tajung ka nung tema nung metetdaksütsü ta parnokisa ashi.

Tangar meranga aser asentzü sena inyakba nungi ajanzükba rakzüka jangratema aliba ya magizüker. Tarutsü tajung ka atema asenoki tanü bendanga agüja inyaksüla. Asen state nung tashiyim agi sen meshiba, ochimashiba aser tetsübu adokdaksüba inyakyim anema noktaksü ayongzüker, ta BAN-isa ashi.

BAN-isa state sorkar dang tashiyim agi sen meshiba anema mapa inyaksü aser iba mapa inyakertem pua merenshitsü takhangba agütsüogo.

MSE-CDP Scheme shitak dang inyaka arudar

Directorate of Industries & Commerce, NIDC Ltd, Ministry of MSME-DI, Dimapur aser Directorate of I&C nung Engineering Wing den SPV members-i CFC Wooden Furniture Cluster, Toluvi (MSE-CDP Scheme) reprangdangogo.

Iba mapatong nung India sorkari Rs. 10.16 crore agütsür aser iba nung Ministry of MSME, GoI (80%), Nagaland sorkar (10%) aser SPV - CCDS (10%) lir. Iba mapatong ajanga furniture industry nung local

units yaritsü imlar.

Iba mapatong ya sentong atongba ama shitak dang inyaka arudar aser mapang lateta aliba nung renemtsü ta CFC Wooden Furniture Cluster, Toluvi semdangertemi metetdaksüogo.

Ketdangsurtemi iba mapatong shitak inyaka aotsü atema tenük yoka arur aser tanüngba kol kar bener arua amenokba sülen mapatong renemtsü, ta ketdangsurtemisa ashi.

January 18, 2025 nü CFC Wooden Furniture Cluster, Toluvi semdang rongnung NIDC Chairman Kvulo Lorin, Commissioner & Secretary Industries & Commerce Shanavas C (IAS), aser Industries & Commerce Director P. Tokugha Sema nunger dena liasü.

Parnok den külemi Dept. of Industries & Commerce, NIDC Ltd, Ministry of MSME - DI, DIC Dimapur aser Directorate of Industries & Commerce Engineering Wing ketdangsurtem den SPV züngsemtem dena liasü.

CFC Wooden Furniture Cluster, Toluvi nung civil works 95% renemogo aser Ministry-i agizükba ama koltem alir.

Ketdangsurtemisa component wise expenditure details reprangdangogo aser ajak shitak dang ta ajitetogo. Iba mapatong nung kol 60% tashi supply asüba lir aser tanüngba koltem order asüba len tom nung arudar ta ketdangsurtemisa osang metetdaksüogo.

Manipur, Tripura & Meghalaya State Foundation Day among



Governor La Ganesan

Dimapur, January 21, 2025 (TYO): Raj Bhavan, Kohima nung January 21, 2025 nü Manipur, Meghalaya, aser Tripura state foundation day ayongzüka mongogo.

Nagaland nung alirtem ajak tenüng nung state asem nung alir den salem abener ta Nagaland Governor La Ganesan-i metetdaksü.

"Iba anogo ya konang aser meyipa reprangshiba mapang ka lir. Iba anogomong ajanga 1972 küm state asem akümba jangjatsür aser state shia maitsü aser putiotsü balala lir. Iba anogo nung Manipur, Meghalaya aser Tripura nungertemi linük sobaliba tali takarba kümdaksüba atema tetushi agütsür" ta Governor Ganesan-i ashi.

"India kübok Northeastern state tem külem putiotsü aser tesentaktep ajanga longjemdaksür. Asenok tesem, oshi aser sobaliba balala süaka asenok ajaki asen state aser linük nung yimjung, terenlok aser tejakleni aotsü taginübatem ajanga ka akümer. Nagaland nung arua aliba Manipur, Meghalaya aser Tripura nunger dang iba telongjem sayutsü ayongzüker. Nenoki Nagaland renlokba nung shilem tulu agiogo aser iba asoshi ni Nagaland nung

alirtem tenüng nung pelaba metetdaksür" ta paisa ashi.

Iba sentong nung Maram union, Manipuri Cultural Society, Manipuri Dance (Nabarum Laishram) aser Zeme o Zeliang Hoho nungeri shilem balala agia liasü.

Manipur state tenüng nung Mao Union, Kohima President Dihe Mao, Meghalaya state tenüng nung Dr. Luke Rymbal aser Tripura tenüng nung Nabarun Ghosh nungeri o tatsütsü jembia liasü.

Sentong nung Joint Secretary to Governor, Mhomo Tungoe-i tesentepertem pelaa agizük aser Under Secretary to Governor, Kevingozo Visa-i anküp tepela o jembi.

PM Modi-i Statehood Day salem lemsatop

New Delhi, January 21, 2025 (Agencies): Prime Minister Narendra Modi-i Mongulbarnü Manipur nung alirtem den Statehood Day salem lemsatopogo.

"Manipur nunger den Statehood Day atema salem abener. India renlokba nung Manipur nungeri shilem agiba atema kanga nüma atanger. Manipur maneni tejakleni aotsü atema moatsür" ta PM Modi-i ashi

Prime Minister-i Statehood Day atema salem lemsatopaka, tesüiba ita 20 tashi mepetmesü tensa indang olen kecha mejembi.

Prime Minister-i ola madokba atema Manipur nung nisung aikati mepelar.

PM Narendra Modi-isa tanü Meghalaya aser Tripura nunger den Statehood Day salem lemsatopogo.

CM Neiphiu Rio-i Khozaosie Hok-Ah benjung nung aden



Dimapur, January 21, 2025 (TYO): Chief Minister, Neiphiu Rio-i January 21, 2025 nü Thonoknyu Town, Noklak nung Khozaosie Hok-Ah Festival nung aden.

"Khamniungan nunger den Khozaosie Hok-Ah salem lemsateper aser iba ajanga Naga nunger sobaliba sayur. Asenoki benjungbentsü ya yimjung, telongjem aser teputep ajungketa amongtsüla" ta CM Rio-i ashi.

Noklak nung alirtem tesentaktep akangshitsü aser kati ka akhümtsübutepetsü ayongzüker. Noklak district ya international boundary nung lir aser asenoki renloka aotsü atema temulung agütsütsüla ta pai ashi.

"Khozaosie Hok-Ah amala benjung ajanga asenok inyaksangshi nenshiba dang masü saka nübertem sabang ka nung longjemtsü atema maangka agütsür. Ibala telongjem ajanga Nagaland nung terenok aser

azükaru bentsür arutsü" ta CM Rio-isa ashi.

"Lanuputui asen senmang atema nüma atangtsüla aser oboula nunger mapang nungi benshia aruba sobaliba aser inyaksangshi takar wazüka ayutsüla. Lanurtemi Naga nunger senmang tejakleni bener aotsüba nung tongti shilem agitsü" ta paisa shisem.

Iba benjung ya Khamniungan Tribal Council-i ayongzüker aser Nagaland sorkaria teyari agütsü.

Dimapur nung Lighthouse School project atema senden amen



NECTAR Project kübok Lighthouse School atema senden ka January 21, 2025 nü Deputy Commissioner, Dimapur indang Conference Hall nung amendang Deputy Project Director, NEP-(NECTAR), Avelu Ruho-i NEP-The Lighthouse Project indang nukjidong lemsatepdang tangokba noksa nung angur.

Dimapur, Aenjeti/January 21 (TYO): NECTAR Project kübok District Committee for Lighthouse Schools (LCS) shisadokden senden ka January 21, 2025 nü Deputy Commissioner, Dimapur indang Conference Hall nung mena liasü.

Iba senden ya Deputy Commissioner, Dimapur, Dr. Tinojongshi Chang, NCS lenisüba kübok amen aser iba project atema Dimapur Higher Secondary School, Nagarjan, Dimapur shimtetba indang pai lemsatepa liasü.

Chang-i züngsemtem aser teshimtet nisungtem pela agizük aser iba project ajanga temelenshi arutsü teimla aliba lemsatepa liasü aser iba project takok ngua inyaksü aser mapang shidak nung tembangtsü atema akokba lenmang nung yaritsü ta ashi.

Iba senden nung Deputy Project Director, NEP-

(NECTAR), Avelu Ruho-i jembidang, Lighthouse Schools Project nukjidong ya government school tem nung ketdangsuba, shisaliok sayuba aser angazükba environment tajungba kumdaktsüsü lir ta ashi.

Ibai Northeast India nung World Bank ajanga senotsü teyari agütsüba shisaliok inyakyim mezüngbuba lir, koba 2019 nung proposal benok aser 2020 nung agizüker 2021 nungi tenzüka mapa kuma inyaka arur, ta lai ashi.

Ruho-i iba project nung tongtipang components indang tongmelang agi rateta ashidang, system management tajungba kumdaktsüba, sayuba tajungba kumdaktsüba, technical teyari tena lir, ta ashi aser stakeholders tem dang iba maparen takok angutsü asoshi yariteptsü ayongzüka liasü.

Iba project ya küm pongu atema World Bank ajanga

senotsü teyari agütsüsü, aser iba ya ajanga Nagaland indang education system nung tayongzüka balala, talisa school governance tajungba akumtsü, shisaliok sayuba yimya tajungba kumdaktsüsü aser angazüktsü atema environment tajungba kumdaktsüsü, ta Ruho-i ashi.

Iba project nung nüburtemi shilem agitsü kanga tongtipang lir, anungji stakeholders temi shilem agitsü la, ta laisa ayongzü.

Social Associate, Ransom Lungleng ajanga project indang "environmental aser social aspects" indang lemsatepa liasü.

Senden nunnga academic block aser tetsür aser tebur tem atema hostel tem densema school atema lay out plan reprangtepa liasü.

Iba senden nung district ketdangsür aser civil society organization balala nungi teshimtet nisungtem dena liasü.

Aghunato nung Republic Day atema mapalem senden amen

Dimapur, Aenjeti/January 21 (TYO): Aghunato ADC headquarters kübok aruya aliba 76th Republic Day atema heads of offices ajunga mapalem senden ka January 20, 2025 nü mena liasü.

Iba senden nung department

balala nem Republic Day 2025 takok ngua amungtsü asoshi mapa balala nunglokja liasü.

Senden nung ADC Aghunato, D. Robin, NCS ajanga government offices, educational institutioins, business establishments, ward ketdangsür

aser nüburtem atema January 24, 2025 anepdang 7:00 ako nungi tenzüka lokti nübuttsük alitsü ta metetdaksü.

Iba dak sendakba nung nisung ajak dang iba lokti nübuttsük nung arua shilem agitsü ayongzü.

January ita atema Phek DPDB senden menogo



Phek DPDB pur senden ka January 21, 2024 nü DPDB Conference Hall, Phek nung amendang tangokba noksa nung Advisor, New &Renewable Energy & NSDMA aser Chairman, DPDB Phek, Z. Nyusietho Nyuthe angur.

Dimapur, Aenjeti/January 21 (TYO): Phek District Planning & Development Board (DPDB) ita shia amenba senden January ita atema DPDB Conference Hall, Phek nung January 21, 2025 nü menogo.

Iba senden Advisor, New &Renewable Energy & NSDMA aser Chairman, DPDB Phek, Z. Nyusietho Nyuthe lenisüba kübok amen

aser pai züngsemtem pela agizükba o jembia liasü.

Senden nung ARCS, Phek, Department of Cooperation, Jacob Rengma ajanga co-operative society tem tenzüka, district profile, co-operative society tem jenjang, state nung co-operative society tem asoshi tapet scheme tem indang tejangja PowerPoint nung agüja liasü.

Deputy Commissioner

& Vice Chairman DPDB Phek, John Tsulise Sangtam, NCS ajanga district nung ketdangsür aser staff ajunga dang Republic Day 2025 nung ajaki shilem agitsü nenshia metetdaksü.

Taruba DPDB senden nung Department of Forest & Environment, Health & Family Welfare dang department inyakyim osang agütsüsü nunglokja liasü.

MLA Azo-i lanurtem dang mapa tajung inyaksü ayongzü

Kohima, Aenjeti/January 21 (TYO): Lozaphuhu yimtsü nung 35 buba Phek Area Sports Association (PASA) meet Mongulbarnü tenzü.

Iba sentong tenzüka nung alakteta jaoker ama jembidang MLA aser leader of NPF Legislature party, Kuzholuzo (Azo) Nienu-i lanurtem dang mapa tamajung ajak meinyaki mapa tajung aser shidak inyakba nung rangloksü ayongzüka liasü.

Meshia achiba yimya masü inyaker achiba yimya amshitsü, ta pai ashi.

Paisa maparen ajak meranga aser ochishia inyaksü nüngdaker ta ashi aser Tsüngrem mezüng südaktsüsü aser chichiba Khristan ka ama Pa yimli tali ajungketa alitsü ayongzü.

"Tatem nung nisung ka tanüla kumzüka dak alaka nü jenjang, nü rongsen aser nü shisatsü ajanga na malangzüksü," ta MLA Azo-i ashi.

Nai ochishia aliba, nü yimya aser nai mapa tajung inyakba ji dang züngshitsü, ta pai ashi.

Iba sentong nung PASA tir Kudezo Vero-i tir o jembi aser Tizu Area Sports Association tir



MLA Azo-i January 21, 2025 nü Lozaphuhu nung 35th PASA meet tenzüka sentong nung o jembidang tangokba noksa nung angur.

Ludoveyi Vero-i salem o jembia liasü.

Maneni Savoto Rhakho, Games & Sports secretary PASA ajanga iba asayamung nung shilem agirtem tenangzüktep agia liasü. Iba asayamung ya January 25, 2025 tashi alitsü.

Northeast nungi osangbener temi Maha Kumbh 2025 semdang



Northeast nungi osangbenertem Media Tour mapang tangokba noksa ka yangi angur.

Prayagraj, Aenjeti/January 21 (Agencies): Northeast India nungi osangbener nisung 14-i Prayagraj nung Maha Kumbh 2025 semdang, koba Press Information Bureau (PIB) ajanga Government of Uttar Pradesh den lungjemer January 21-23, 2025 anogotem asoshi media tour ka ayongzüka lir.

Parnok Mongulbarnü Prayagraj tongogo.

Arunachal Pradesh, Assam, Manipur, Meghalaya, Nagaland, Sikkim, aser Tripura nungi osangbener tem yagi alima nung tamangba yimsü tsütsü lokti adenshiba sentong tulutiba rongnung ka indang osangabentsü maongka balaka angutsü.

Print, electronic aser digital media nungi osangbener temi Maha Kumbh Mela indang sobaliba aser yimsü ngua osang lemsateptsü.

Northeast nungi iba telok nungya Arunachal Front, Asomiya Pratidin, Dainik

Asom, DY365, Time8, Sangai Express, The People's Chronicle, U Peitngor, The Morung Express, Hornbill TV, Summit Times, Swatantra Aawaj, Headlines Tripura aser Satyabhashan alitsü.

Maha Kumbh ya January 13 nungi February 26, 2025 tashi alitsü, koba Samudra Manthan mapang atalokba nung tera yanga lir aser iba mapang Prayagraj, Haridwar, Ujjain aser Nashik nung ninang mojitzi tzüjang tsük ta jembir.

Iba sentong nung temeshi tzi agiba tetetzü tanüla mürekba aser meshiteta temaitsü alitsü.

Taküm Maha Kumbh nungya devotees crore 45 dak temai shilem agitsü imlar, kong international visitors lakh 15 shi alitsü, kong 2019 Kumbh Mela nung nisung crore 25 dena liasü.

Iba Maha Kumbh ya tanüla tsütsü kisüng tongtipang masü saka iba ya ajanga alima dang India nung sobaliba tajung sayur.

Sorkari Sanjay Roy tasüba agi merenshitsü akhangtsü: Mamata

Kolkata, Aenjeti/January 21 (Agencies): Sanjay Roy taküm tepeyong tepuokdak ayutsü obendang agütsüba agi temulung mesüi CM Mamata Banerjee-i ashiba agi, Bengal sorkari pa tasüba agi merenshitsü atema high court dang mepeshitsü.

"Tanü court-i obendang agütsüba angashia ni kanga aoksaogo. Iba ya ken o khenyongi balaka aser capital punishment agütsütsü nüngdaker. Onoki high court nung aija alisang nem capital punishment agütsütsü

mepeshitsü," ta Banerjee-i ashi. Osangbenertem den sensaksemba mapang Banerjee-i ashiba agi, ken o ya CBI nem magütsüi Kolkata police-i dang bushisüngdang asüba balaka sür lila.

"Ken o ya onoki bushisüngdang asübo tasüba agi temerenshi ya alemli agütsür lila," ta Banerjee-i ashi. "CBI-ken o kechi koma achayang aji ni mejangja aser osang tejangja parnoki dang agütsütettsü. Ken o ya onok ket nungi asa-a bener ao. Mezüng anogo nungi onoki tasüba agi merneshitsü

khangogo aser maneni akhanger," ta laisa shisem.

CM-isa, Bengal police-i taoba mapang iba amala mesükba ken o nung aibelena alirtem nem anogo 54 nungi 60 tsüngda tasüba agi temerenshi agütsüogo, ta ashi. "Kechiba iba ken o nung capital punishment magütsü," ta lai asüngdang.

Banerjee-i, la aser TMC-i tasüba agi merenshitsü asoshi maneni akhangtsü, ajisüaka obendanger kati obendang magütsü tsüngda ken o kanga junga asadangtsü nüngdaker, ta ashi.

BJP-i Delhi manifesto tanabuba shilem sayaogo

New Delhi, Aenjeti/January 21 (Agencies): Bhartiya Janata Party (BJP)-i Mongolbarnü kindergarten (KG) nungi post-graduation (PG) tashi sorkar institute tem nung nüngdaka aliba purtem nem angati education, competitive tatidang atema senotsü teyari, Scheduled Caste (SC) kaketshirtem nem scholarship scheme ka agütsütsü aser Aam Aadmi Party (AAP) sorkar ochi mashi ken o asadangtsü atema Special Investigation Team ka tentetsütsü nangzükogo.

February 5 nü Delhi assembly elections atema manifesto tanabuba shilem sangdongba mapang BJP-i, auto-taxi driver atema welfare board ka amenoktsütsü, life insurance lakh 10, accident insurance lakh 5, vehicle insurance atema subsidy aser parnok tanurtem atema scholarship agütsütsü nangzükogo. Iba amala mesükba board ka domestic workers tem atema-a nangzükogo.

Taoba Union minister Anurag Thakur-i "Sankalpa Patra-2" ya BJP headquarters nung saya aser taruba küm pongu tsüngda

Delhi renloka odaktsütsü nangzüka liasü. BJP tekolakba JP Nadda-i manisesto mezüngbuba shilem ya Hokolbarnü saya liasü.

Thakur-i ashiba agi, BJP sorkari India ajunga nung public welfare schemes tem tongtibangsa benokogo. Paisa, developed Delhi Resolution 2025 dak sendakba nung Nadda-i pa tebilemba lemsatepba indang tetshia jembia liasü. Developed India ka indang bilemdang developed Delhi yagi tongtibang shilem agütsü lir, ta Thakur-i ashi.

"Delhi nung sorkar institute tem nung nüngdaka aliba kaketshirtem nem KG nungi PG tashi angati education agütsütsü. Competitive tatidang aser administrative service tem atema renema aliba lanurtem nem senotsü teyari sen 15,000 agütsütsü. Onoki parnok tatidang atema senzüba mapang intokba sen menoktsü atema teyari agütsütsü. Sorkari entrance exam fee anaben agütsütsü," ta Thakur-i ashi.

BJP-i, Dr BR Ambedkar Stipend Scheme kübok SC kaketshirtem nem ita shia sen 1000 agütsütsü nangzükogo. Iba

scheme kübok ITIs [Industrial Training Institutes], skill centres, aser polytechnics kaketshirtem nem ita shia sen 1000 agütsütsü.

Kasa mapang nung AAP sorkari küm pongu nung SC kaketshir pongu nem dang scholarship agütsüba atema Thakur-i AAP sorkar aija liasü. "Centre sorkari SC kaketshir 345,000 nem scholarship agütsüogo," ta pai ashi.

AAP tekolakba Arvind Kejriwal-i ashiba agi, BJP manifesto ajanga party-i Delhi sorkar school tem nung angati education agütsü aliba anendkatsütsü ta sayuogo. "Parnoki ashiba agi, sorkar institute tem nung nüngdaka aliba kaketshirtem nem angati education agütsütsü. Ajisüaka kaketshir ajak nem school tem nung angati education agütsüdar. Parnoki nüngdaka aliba kaketshirtem nem dang angati agütsüner. Iba ajanga Delhi nung angati education agütsü aliba anendkatsütsü. BJP-i parnok tebilemba sayudar. Parnoki AAP sorkari agütsü aliba tajangzüktem ajak anekdaksütsü," ta Kejriwal-i ashi.

Chhattisgarh nung Maoists züngsem 14 tepsetogo

New Delhi, Aenjeti/January 21 (Agencies): Mongolbarnü Chhattisgarh aser Odisha na arrtsü anasa Gariaband district nung Chhattisgarh Police den khatepba sülen Maoist züngsem 14 tepsetogo, ta police-i ashiba news agencies ANI aser PTI nati metetdaksü. Asürtem rongnung Maoists züngsem tetsür ana Hombarnü meita aoba mapang tepsetba densema lir.

Sen crore 1 agütsütsü asoshi nangzükür aliba Maoist züngsema ka meita aoba mapang tepsetogo, ta police-i ashiba den telungpurtem den maneni khatepdar, ta shisem.

Iba lendong nung Maoist tem asüba tali akümtsü akok ta osang ajangsa metetdaksü.

Tatalokba dak sendakba nung Union Home Minister Amit Shah-i ashiba agi, iba ya 'Naxalism' atema takoksa tulu ka lir.

"Naxalism atema ano takoksa tulu ka ajangshiogo. Naxal-free Bharat ka yangertsü atema security forces temi takok tulu ngua arudar. CRPF, SoG Odisha, aser Chhattisgarh Police nungeri Odisha-Chhattisgarh arrtsü nung meita aoba mapang Naxalites 14 tepsetogo. India nungi Naxalism agintsü atema bendanga agütsür aliba aser

security forces temi longjemer inyakba ajanga Naxalism samatsü ana nung lir," ta Shah-i X nung post ka ajanga ashi.

Maoists tetsür züngsem ana tepsetba den CoBRA jawan ka yiruba sülen Hombar aonung aser Mongolbar anepdang Chhattisgarh-Odisha arrtsü anasa Mainpur police station kübok arem nung security force aser telungpurtem khatepa liasü, ta ketdangsürtemi ashiba PTI-i mettedaksü. Iba lendong nung ano Maoists pur 12 tepset liasü.

Ketdangsüri ashiba agi, District Reserve Guard (DRG), Central Reserve Police Force (CRPF), Chhattisgarh nungi CoBRA aser Odisha nungi Special Operation Group (SOG) nungeri iba meita aoba sentong nung shilem agia liasü.

K e t d a n g s ü r i s a , Chhattisgarh kübok Kularighat reserve forest nung Maoists tem munga aliba indang itangitertem nungi osang tejangja angazükba sülen meita aoba sentong ya January 19 nü tenzüka liasü, ta ashi.

Hombarnü meita aoba mapang Maoists tetsür ana tepset aser khatepba tesem nung prangbong, injang aser IED tem aika ngutetogo, kong self-loading rifle tema densema liasü, ta ketdangsürtemi ashi.

Delhi assembly election nung candidate 699 tokteptsü

New Delhi, Aenjeti/January 21 (Agencies): Menden 70 atema Delhi Assembly election February 5 nü agütsü renema lir, aser iba election nung candidate 699 toktepba angutsü, koba 2020 küm dang nungi tera agi timba asütsü.

Küm pongu tejakdang Delhi Assembly election nung candidate 672 toktepa liasü.

Delhi chief electoral officer-i ashiba agi, Arvind Kejriwal toktepba New Delhi constituency kong BJP nungi Parvesh Verma aser Congress nungi Sandeep Dikshit nata tokteptsü lir iba constituency nung nominee (23) timba lir.

New Delhi sülen tangbuba jenjang nung Janakpuri lir kong candidate 16 lir aser Rohtas Nagar, Karawal Nagar, aser Laxmi Nagar nunger nungia candidate terpongungu lir.

Patel Nagar aser Kasturba Nagar na nung candidate ishiba lir. Iba constituency ana nung ya candidate pongungu lir. 2020 küm Patel Nagar menden ya Scheduled Caste candidate tem atema mekazüka toktsür liasü aser candidate pezü dang toktepa liasü.

Assembly constituency 70 nungi menden 38 nung

candidate 10 dak tajemba lir. Temetetsü kaji Tilak Nagar, Mangolpuri, aser Greater Kailash amala constituency tem nung candidate trokrok lir aser Chandni Chowk, Rajendra Nagar, aser Malviya Nagar nunger nung tenetnet lir.

Aam Aadmi Party aser Congress napronglai menden 70 prongla atema candidate tem shimogo aser kasa mapang nung Bharatiya Janata Party-i parnok den sendaktepa aliba party Janata Dal aser Loktantrik Jan Shakti Party na nem menden kaka toktsür menden 68 nungi tokteptsü.

Bahujan Samaj Party-ia constituency 69 atema candidate tem tenüngsang sangdongogo.

Nomination atema mapang lapoktsür aliba mapang candidate 981-i nomination documents 1,522 benok, koba January 10 nü tenzüka liasü. January 18 nü candidate tem tatemsa asadangshiba sülen January 20 nü candidature agintsü asoshi tatembangbuba anogo tembangba sülen candidate tem tatembangbuba list sangdongogo. Election ya February 5 nü agütsü aser result February 8 nü sangdongtsü.

Choirmasters Conference 2025

At Nagaland Conservatory of Music April 21 - 25, 2025

- Topics
- Conducting techniques
- Rehearsal methods
- Rehearsal planning
- Song leading
- Choir building
- Music theory
- Vocal techniques

Resource persons
Lipokmar Tzudir | Pfothokho Kayina
Tiakumzuk Imchen | Vini Assumi

NCM choir will sit as the master chorus

Accommodation Available



Scan to Register

Contact: 9366239275



TIR YIMYIM YIMOBILEM (EDITORIAL)

DIMAPUR RASEMNÜ, JANUARY (AENJETI) 22, 2025

Trump asoshi America tama !

United States nung alir America nungertem ya onsara tesadok, temulung tulu, tasü tait aser tangar dang temeim sayunüba purtem lir. Ibayongji, parnoki alima nung sadoksadoka alitsü meranger aser tangartema yamaji lidaktsüner. Iba tangatetba aliba jagi bendangertem aika US nung oa sademsadema lia US senso akümer aser ano aika temelaba magii ozüng alema oa US nung mapa inyaka aliba purtema lir. Item ozüng alema oa US nung alirtemji US asoshi tajangzük agütsürtem masü, anungji parnokji meindoktsü aser bendanger shinga ozüng alema U.S-i marutettsüsa nokdangtsübaji tang US tir tasenba Donald Trump temulungtetba aser tenangzükba lir. U.S. nung akaba temoatsü aser tajangzükji U.S nunger atema tama asütsü, anungji bendangertem arua US nung aliba agi U.S. lisopurtemang timtemtsüsa aser teküpbok tiai aitsüsa Trump yimsüsüba mapang kenyongi memelatsü ta yakanü Donald Trump tanaben U.S tir inyaktsü tenangzükba agiba sentong nung pai metetdaksüba asenoki angashiogo. Atangji, shi azü nung aser tashiyim amshiba nung Donald Trump daka tashimait alitsüa akok saka pa dak tajung ka reprangtetbaji pai par lima aser par nübortem kanga meimer. Iba jagi, Democratic telok nungi adoker taoba tirtemi alima asoshi tajunga ta ser inyakba mapatem aika pa asoshibo mapet akümer. Aji oda, alima kintem ajak longjemer alima nung nübortem tashidak nungi jenbua lidaktsütsü asoshi külemi inyaktsü tentetba World Health Organisation (WHO) nunga U.S. madentsü aser alima tzü mopong kümzüka ayutsü atema alima kintem longjemer senotsü tsüktepa inyaktsü asoshi Paris senden nung lemtetba sentong nunga U.S. madentsü ta Trump-i metetdaksübaji America tama ser külenang alima reprangtsü ta asüba tangatetba nung inyakba mapatem lir. Atangji, America ajungtsü kisüng bilema inyakdang, alima kintem telongjem, United Nations, kübok külem ser inyaka aruba sentongtem nung maden oa adokbaji alima asoshi takoksa asütsü aser America asoshia America nunger memesük asütsüa akok. Aji oda, U.S. ama kinibo alima kintem longjemer inyakba mapa tem nung madentsü ta masü saka sentong ajak nung U.S. kolok aser U.S. sen denerang America nungertemi lenisüba tajung agütsütsü alimaibo imlar. Ajisüaka, U.S. nung yimten telok ana Democratic aser Republican teloktem tangatetba aser nukjidong balala, anungji Democratic purtemibo U.S. rongsen aser nübo lalua alima ajungtsü asoshi inyaktsü kecha korua mali, iba jagi parnok yimsüsüba mapang alima kintem den longjemer alima ajungtsüba sentongtem tenzüka aoer, ajisüaka iba jagi America kija asoshibo tajangzük balaka mengui alitsü. Ibayongji, Republican teloki U.S sen agi tangar lima ajungtsü asoshi kangabo lalushibong mesüner. Ano, Republican telok dak tajung kaji, parnoki akhi tsürabur sobaliba tajung meindoki beshiner aser mapa ajak nung Tsüngrem tama sūdaktsür. Iba jagi Donald Trump-i nüborem den jembidang Tsüngrem metetshibo mejembir. Aji oda, yakanüsa Donald Trump-ibo America nung atsüapong tapu ana dang alitsü, tetsür aser tebur, iba dakji alaka tetsür-a masü, tebur-a masü ta amshia aruba 'third gender' malitsü ta kanga jangjaa metetdaksüogo. Iba ama U.S. yimten aser sobaliba nung temelenshi ka arudang, India nunga Khristan-tem asoshi mapang tajungba ka arutsü imlaa atadi. Trump mapang ya alima nung dang masü saka anünglak nunga America nungertemi Mars petinu tashi nung tua tesep yanglutsü temulungtetba lir. Aji oda, pa tir menden nung mememka Israel aser Hamas telok na tsüngda yimjung yangluba yagi Trump tashi aser akhüm ka sayuogo. Ano, Trump-i Russia aser Ukraine na tsüngda raraba aser Myanmar nung sepaitemi nübortemi mulungba anema inyakba mapatema kopi melii pa tebang iagi anendaktsütsü imlar. Meimlaba o ka, Trump-i ashibaji, America nungertemi nisung taküm aser rongsen jenti endoka ayong tuluka yanglur Panama lima nem agütsüba Panama Canal meyipa meshitsü metetdaksübaji, talisa, Panama nunger asoshi shisabolutsüka asütsü. Iba jagi Trump-i tangar alima kintem nema America tama tenzüker külenang China ama lima den yaritepang ta osang tesashi ka metetdaksür asütsü.

OLEMSABANG

YIMLI ANA NUNG MEIMCHIRASER KIBUR

- Süpongñüsang Longkümer,
Darogapathar Dimapur

Alima nung yimli anaji Government yimsüsüba aser yimsüsürtemji (MP) nüburtemi shimba ama saka PM, MP temi aser President elector temi MLA tem nüburi, CM rolling party temi, Governor ya center government-i state dangi yokba angazüker. Mezüng tsüraportemi Arogo tenzüker dang sarasatem telok ajanga tenzüker, aser Sannüker asütsü lokdi ajanga pushia shim, aser Decontem committee-i tajunga ta ajitetbabur shima arur yamaji doklang tenzükerkem ajak aser tenzüker tenzüklä tem ajak lokdi ajanga nüngtet kati tang shima arur item mapa ajak nung Sannüker mulungba nung meinyaker. Arogo nung Sannükeri Tanüla ania aruba mapa dak alaka anungjiang Arogo nung Office ana intang jembir. Sannüker dak kodang tajung temulung lemtet ajitetdir Decontem lokdi dang ordaind sütsütsü asüngtanger saka aji kibur mulung. Tsüngremi Isreal nunger Ijip nungi jatettsü Mosa tang asüngtang saka nong ni temeli mekike ta langzü saka na apusuang ta Tsüngremi ashi nungji par kibong apusu saka len tom nung Tsüngremi Mosa tepsettsü pushitang kinüngtsüi yakta abetetta japasu memejepdoka aliba mejepdoktsü. Idangjiang tepsettsü pushiba anen. Iba tetezü japasu azü agi tebo taküm alangzük. "Atangji ni atema azü agi kiyimsangji na lir." Anitet 4: 24. Ordaind bei mulungba agi makizüker. Tamangba ya aika liaka Tsüngremi süngyanglutem dak amangba züngoka mali aser asenokia mezüngshili. mojingi tiyanglusang anema ashir Ni kotaki atutsü, Tsüngrem petinutem temalen ni kü chuba menden ajongkettsü aser anüolentip tatempang nung ni telok sentepba tenem manung amentsü. Ni mepet temaleni atutsü, ni tematiba mesüka alitsü. Isa 14:13,14. Tsüngrem tenyar Luciferi yamaji Tsüngrem ten raktep anungji Tsüngremi ashir Kotak nungi na koda tsüka lir, oh anüngdang petinu, anüpdang chir kintem teküpoklen ayusang koda na ali donga lepzüka yoka lir. Isa 14:12. Süngyanglu amangertemi rongrong daktsüba ama, Tsüngremia ashir iba anügo nung kibuba nungi rongrongshishi tulu parnok rongnung alitsü aser parnok nisung shiai bei kiyonger teka nung amettsü aser pa teka bei kiyonger anema mekangtsü. Sür shia aruba khrista dak amangertem arogo tamang yimsüsüba nung Tsüngrem dak alema alima ozüng kecha arogo nung mali. Shibai arogo nung tamang makaba mapa inyakdir pa tetemsü masü. Ibalä nisungi kibuba nungi langka angutsü ta tebilempa temulung ana atenba nisung bei yimya ajak nung mesüngjem Ykb 1:7,8. kechiyong Tsüngremi asenok nem tetsüpu masü saka ain aser temeim aser tazüokba tanüla agütsü 2 Timo 1:7.

Government Yimsüsüba nung atentsü atema Tsüngremi Soul chuba mezüja shimtet 1 Samu 10: 1 Dawid ten Tsüngremer ainkar Nathan teti tena liasü. 2 Samu 7: 1 nung angutsü. Yimsüsürtemi nüpurtem asoshi mapa tajung inyakra Tsüngremi pelar aser moatsütsü. Tsüngremi alima yimli nung tamanger mamanger ajak meyoktepba yimsü asür, Alima yimli nungi Tsüngremi Santem Par arogo yimli tangi anitenür. Tanü arogotem nung chitiyongtir tem azüokdaktsütsü atema tenzükerba nung shimoker saka melenshir masü shidakba tenzükerkem timtemdaktsür. Tenzükba mapa nungpo temulung meyipba burji tang masü mapa nung tetangshe asübabur shimtsü Laishibai tour. Arogo nung aser tenzükerba nung bei adianu kitang kimang bei chirtem tsürabortem kecha mali shiba shidakba temulung meyip, Nisung kadi Yisu dang ashi," Ajiang netsü aser nanu nungertemi nü ten ajurutepnüa kima nokdaka lir. "Yisui pa tang langzü kütsü shiba, aser künu nungertem shir?" aser pai bei nütsüngtem tsütsü teka songtoka ashi kütsü aser künu nungertem itemi lir. Kechaser shiri kotak nung aliba küboi mulungba inyakdir paji künu aser küye aser kütsü lir. Tejak reprangba masü saka Tsüngrem ouchi mapa. Mth 12: 46-50. Asenok ken kakat No 2 Kibuba amongnü, iba nungi time signature 2/2 inoka lir anungji yamaji tenti asünung notation jagi memelar. Iba source Redemption notation jagi 4/4 sayua lir. Iba ken jagi tanü asen Yimten yimli aser Ao arogotem inyakyim ten kanga mesüktepba sayur anungji melenshi nung ajungtsü majungtsü ta zülusemtesür.

YIMLI ANAPRONG NUNG TSÜNGREM KIBUR.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agütsü mepishir

Arogo lenir tepsetba sülen Khristanpuri sorkar dang mera agitsü ajungshir

Bogota, Aenjeti/January 21 (Agencies): Colombia linük north tsütsü Protestant Khristan lenir ka January 8, 2025 nü tepsetba ajanga Colombia sorkar dang tamangba yimsü lenirtem kumzuka ayuba security legislation agientsüba 2023 amendment reprangshiang ta akhangba tanaben tenzükshia lir.

People of God Christian Vision Church nung kinungtsü Pastor Karen Nierles-i anir Bible study agiba sülen arogo lenir arishi kum 28 tain Ivan Garcia ya dangar nisung trok den lenmang nung tetsüing agi jaja aodang mejangjaba nisung ana motorcycle nung arua khaset.

Iba mapang prangbong bona alir ana yagi tesülen nungi Garcia dak injang khaloktsüba nung pa dak trokben khashia aser tekolak nunga anaben khashia liasü. Iba sülen prangbong bona alir ya parnok indang bike nung jena ao.

Garcia kinungtsü pastor Nierles-i ashiba agi, pai arogo nung shilem tajung agiba ajanga Garital yimtsüing nung aliba New Rebirth in Christ Church kanga kera ain aser arogo züingsem tenet aliba nungi 30 akum.

Garcia ya illegal armed group nung züingsem ka liasü, saka pa temulung meyiper liasü, ta pastor Nierles-i ashi.

Ita ana tejakdang apuani ya

Garcia mapa inyakba tesem yutsür aodang prangbong ola anaben angashi. Ajisüaka la kinungboi amokmerenba mesüra tekumdangtsü osang kecha mangu ta shia liasü, ta pastor Nierles-i ashi.

"Anogo ishika tejakdang pai Laishiba nungi sayutsü tsüboa mali ta ashi. Pai küdang 'Takum alitsü Khrista meyong aser asübaji tajangzük lir,' ta shia liasü," ta lai ashi.

Ibai northern Colombia nung hopta ana tsüingta Protestant Khristan lenir tepsetba tanabuba alitsü, anungji tamangba yimsü lenir dak tenük yokba tali akumer südi ta bilemer, ta Advocacy for CSW indang director Anna Lee Stangl-i ashi.

"Ivan Garcia kinunger aser arogopur den CSW külemi mang ayimer," ta lai ashi.

"Lendong liaka tamangba yimsü mechi Garcia-i illegal armed group nungi pilatsü telemtetba agi, aser pa takum nung iba lenmang shimba mechi pa takum agitsüsa akumba ya khenyongi magizükteter."

December 29 nüa Aguachica, Cesar Department nung Deobarnü tekülem sentong agiba sülen restaurant ka nung chiyongtsü mena alidang prangbong bona alirtemi Pastor Marlon Lora,

pa kinungtsü Yurlay Rincon, jabasi Santiago aser jala Angela nunger dak injang khaloktsü, ta Stangl-i ashi.

Iba mapang Santiago kisüing takum kumzük saka pa kanga sashia yirua liasü aser anogo ishika lir mozüki nung asü.

"Garcia tepsetba yimya ya hopta ana tejakdang Pastor Marlon Lora aser par kibong ajunga tepsetba den mesükteper, aser ibai jelia sentong yanglur inyakba amai sayur," ta lai ashi.

Colombia sorkarei Decree 1066 yanglushitsü telemtetba agiba atema lai tenüing asen, koba ajanga lendong aliba nisung, nübur aser telok nem security agütsütsü shia lir.

Protected category nungi tamangba yimsü lenirtem agienba ajanga parnok melamela azüdokshi ajurur, ta ashi.

"Tamangba yimsü tsütsü lenirtemi yimjung yangluba nung shilem agiba aser nüburtem dang azüdokshi aser mapa tamajung inyakba nungi pila alitsü ajungshiba mechi mapa tamajung inyakba telok temi parnok dak tenük yoker," ta Stangl-i ashi.

Lendong anaprong kanga junga bushisüingdangtsüla aser aibelener nem tapet temerenshi agütsütsüla, ta laisa ashi.

ANOGO ABEN TSÜNGREM DEN

SAKSALEMA LIANG

"Saksalema liang, tamang nung akanga nokdakang. Teburchi ama süang. Tashi itang. 1 Kor. 16:13

Asen taküm ya temalen-a, telonglen-a tatidang agi sünga lir. Aluyimer ka indang nok nü arangshiba ama tamanger ka asoshi anepdang shia longzük tajung g nung temenen tatidangji tanela kümküma arangshiba longzük lung ama lir. Kechiyong anogoshia asenoki temenen tatidangji ajurutsü, shirnok tanela nung saksalema alir parnok kümzüktsü.

Telonglen tatidang ta asübaji tangari mangur saka pei-i dang metetba aser anguba shisatsü, teshisadangba, sentong, mapa, jakla, mulungsentsü nung atidangba indang jembir. Iba nung mojingi mapa meinyakdaktsütsü kanga kümdanga mita alitsüla. Kechiyong Tsüngremibo ajak ateta angur asünung pa tsüingdang asenok teti shitak alitsüla.

Temalen tatidangji anogoshia aseni meteta, ngua ajuruba temenen mapatem, achi-ajem nungi tenzüker taküm liba- liro mejungi aliba dang ajar. Item temenen mapa ajak nungi merükteta alitsüji kanga tenüingdaktsü. Temenen mojingji kanga tekülak aser tesangra asünung kecha südanga pa nem mashiokdaktsütsü asoshi sakasalemtsüla.

Tip balala len nungi aruba mopong nem onshidaktsüba süngotuo ama mesüi tamang nung akang akanga nokdakba tamanger ka asütsü merangdi.

India nung Khristan tsür ka merenshiba sülen tanur raksa indok

New Delhi, Aenjeti/January 21 (Agencies): Central India nung Khristan tsür ka dak lar kinunger tribal nisung temi züka merenshiba sülen tan ita la tebok nung bona aliba tanur raksa indok ta osangtem ajanga ashir.

Kunika Kashyap ya mashisa kumer ita trok dak tema lia January 2, 2025 nü Bastar district, Chhattisgarh kübok Jagdalpur nung aliba Government District Hospital-Maharani nung temang kanga mejungi admit asü.

Lai kasa kinunger ka - Khristan - atema sarasademtsütsü ta teimla nung tribal village headman Ganga Ram Kashyap-i video tangokba sülen iba anogo Ganga Ram Kashyap, pa kinungtsü aser jala temi la dak züka merenshi, ta la kinungbo Mandu Ram Kashyap-i ashi.

Bade Bodal yimtsüing nungi arishi kum 25 tain Kunika Kashyap ya lar kidang nungi 150 meters shi pilar lar kinunger ka (Khristan) shiranga aliba semdangi ao. Shiranga alila tepuba teti aser Kunika Kashyap kinunbu'er kinunger Ganga Ram Kashyap-i la ki telungi aiba angu.

Kunika Kashyap ya shiranga alila anasa yiptenzüing nung amendang Ganga Ram Kashyap-i pa indang mobile phone nung la record asü tenzük,

ta Jagdalpur nungi Khristan lenir Salim Hakku-i ashi.

"Kunika-i shiranga alila asoshi sarasademtsütsü südi ta temulung melemtetü kuli asoshi la indang cell phone nung tangoknü," ta Hakku-i ashi.

Kunika Kashyap-i tai apu saka Ganga Ram Kashyap-i memulungi video tangok, ta lai ashi.

"Ni memulung yonga pai maneni tangokba ajanga ni pa teka nungdoktsü," ta Kunika Kashyap-ia Morning Star News dang mozüki yipten nungi ashi.

Ganga Ram Kashyap-i indangji la merenshi tenzük aser pa kinungtsü aser jala arsanga arua merenshi tenzük, ta Kunika Kashyap-i ashi.

"Ganga Ram-i kü indang tepok nung pa tetsüing agi metsü, tekong nung alen aser kanga sashia azük. Pa kinungtsü aser jala arua kü dak süng agi azük, tekom tepok, tekolak aser temang ajunga nung azük."

Kunika Kashyap iba tesem nungi jena otet, ta la tepobai ashi.

"Tsüingrem sayatonya ajanga la nisung aseme tanen makai züka merenshiba nungi jenbu," ta la kinungbu-i ashi, shiba parnok yimtsüing nungi 16 miles pilar Jagdalpur nung anogoshi aayanga jajar.

La kinungbui Kunika Kashyap ya Jagdalpur nung

sorkar indang mozü kidangi anir aodang la kanga kangshia liasü, kong treatment ya nikonngdang 5:00 ako meta tenzük ta pai ashi.

Medical records nunga la tekong anguba, tetsüing achichilen anguba, temporo-occipital anguba aser awakba, tepok aser teku anguba, tekong nung contusion aliba aser hopta trok ser anogo trok mashishia aliba indang shia liasü.

"Mezüing ultrasound agiba nung tanur ya takum aliba sayu, saka nikonngdang 6:30 tashinung la miscarriage asü," ta la kinungbui ashi.

Tena kibong kumer kum ana liasü aser la asoshi ibai mezüingbuba mashisa akumba liasü.

Kunika Kashyap ya January 6, 2025 nü mozüki nungi yok, saka iba osang züluba mapang tashi temang nepalua liasü.

Kinungbu Mandu Ram Kashyap den arogo lenir kar dener yangji aliba police station nung January 2, 2025 nü Ganga Ram Kashyap anema ken o ka benok, saka police ketdangtsür temi FIR mezüluok alitsü, kechiaser pa nem copy kata magütsü.

"Police temi mezüing bushisüingdangba sülen FIR benoktsü ta shiaka police temi asüingdangyatsü atema onok maja mesüra kinungtsü indang

kuli memeshi," ta Mandu Ram Kashyap-i ashi.

Police temi January 7 nü parnok ajurua iba tatalokba ki tejangja asüingdang aser ibaji parnoki sayu ta ashi.

Iba yimtsüing nung kilen 120 shi lir, kong Khristan kibong 50 aliba nungi Mandu Ram Kashyap'er kibong ya ka lir.

Yimtsüing nung tamangertem dak tenük yoka arur, ta Mandu Ram Kashyap-i ashir.

"Tesüiba kum ishika nungi tribal village headman aser yimdaklir temi kanga sashia anema nokdaker," ta pai ashi.

Yimdaklir dangartem ataba tzübo nungi Khristanpur tzü metadaktür aser tamangertem asüba onok julila li nunga meremdaktür, ta ashi.

December 29, 2024 nü Khristan tsür arishi kum 90 tain Budai Kashyap asüandang Khristanpuri aliba ali ka nung la arem. Idangji village headman Ganga Ram Kashyap arua la tasüing aremtemelaba agi magi ta asüingdanga liasü. Yangji rongrong adoka Khristanpur aser headman aser par nisungtem den raratepa liasü, ta Manu Ram Kashyap-i ashi.

January 7 nü Pastor Subhash Baghel'er jabaso dang tebu ya Chhindawada yimtsüing nung aremtemelaba, kong tenem tilaka Khristanpur asoshi

yuja lir.

"Pa tetsüitanutsü aser tebou nungera taoba mapang kasa leper nung rema liaka yimdaklir aser yimtsüing nung tekolakba nungeri pa tebu aremtemelaba memulung," ta pai ashi.

Pastor indang jabaso tebu ya yimtsüing indang leper nung aremtemelaba Chhattisgarh High Court dang asüingdanga petition agütsüba court-i January 12 nü magizük. Tebu tasüing ya Jagdalpur mortuary nung yua lir aser pai Supreme Court dang temelaba meshir.

2014 kum May ita Narendra Modi ato kilonser akumba sülen Hindu nationalist Bharatiya Janata Party (BJP) lenisüba nung aliba National Democratic Alliance sorkari Hindu yimsü mamanger tsütsü temulung magütsüba ajanga Hindu extremists tem temulung uludaktür, ta tamangba yimsü temeden asoshi nokdaker temi ashir.

Khristanpur yariba telok, Open Doors ajanga alima nung Khristanpur alitsü linük tamajungtiba 50 asadangba 2025 World Watch List nung India ya jenjang 11 buba nung lir, koba 2013 nung jenjang 31 buba nung liasü, saka Modi yimsüsüba arur tamajungba akum.

AO OSHI ANGAZÜKDAK:

TANÜ ANGAZÜKTSÜBA OJANG

Tebenjem

(n) Taküm nung aiür-asangursa aliba tenükshitsü mapang (prime time)

* Nisung shia pei tebenjem mapang nung mapa tajung aika inyaktsü merangtsüla.

Tebentet

(adj) mebenja, tipdema (orderly)

*Ozü yimtakbo kin-kidong tebentet asem dang lir.



Tir Yimyim

OLONG PAITEP # 7042

	1			2	3			
4			5					6
					7			
	8							
	9		10			11		
					12			13
14								
					15			

TIPILEN		LANGTSÜNGLEN	
2. Sü jeplok	-(4)	1. _____ i	-(4)
4. O agi merenshi	-(5)	3. Kasa masü	-(6)
7. Ayongküm li	-(5)	5. Nüchi masü	-(5)
8. Chiyungtsü mapang süiadok	-(4)	6. Tashi endok	-(5)
9. Tsüngrem den jembiba	-(9)	9. Langtem	-(5)
12. Saklok	-(4)	10. Anü malidang	-(6)
14. Samaba mebushitet	-(5)	11. _____ kibur	-(5)
15. Mejanga onü	-(5)	13. Tebur tembar tsüngda jatepba	-(4)
16. Tzü shiruru ka	-(4)		

OLONG PAITEP # 7041 TELANGZÜBA

TIPILEN :	LANGTSÜNGLEN :
1. Semtu, 3. Lepko, 5. Bilem, 8. Ulu,	1. Sayu, 2. Teb, 4. Kimong,
10. Tsüngpang, 11. Tesangwa,	6. Lungkak, 7. Milak, 9. Zünga,
13. Aoksa, 15. Putir, 16. Yipru.	10. Temopu, 12. Walu, 14. Ali.

NAI-A YA METETTER MA



Wadala nungi Member of the Legislative Assembly (MLA) Kalidas Kolambkar-i mapang talangtiba atongtepa Maharashtra legislative assembly nung constituency ka nungi dang takok ngua MLA inyakba atema Guinness Book of World Records-i kulikaket ka agütsüogo. Kolambkar ya Bharatiya Janata Party (BJP) nungi lir aser 2024 assembly elections nung pai kümsük 9 ben atongtepa takok nguteta MLA inyaker. 1990 nungi pai Wadala (tesüiba nung Naigaon) nungi MLA ka inyaka arur. Chief Minister Devendra Fadnavis lia World Records Book of India-i Kolambkar nem medal aser letter of appreciation ka agütsüogo.

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Manipur hill district tem nung poppy alutem lir: CM Biren Singh



Imphal, January 21, 2025 (Agencies): Manipur Chief Minister N Biren Singh-i Mongulbarnü "war on drug campaigns" tuluba inyaka aotsü metetdaksüogo.

Hill district tem nung anünglen nungi ozüng alema poppy lu ayimba nguogo aser itemji raksa endoktsü ta CM Biren-i ashi.

Imphal nung 53 buba Statehood Day sentong nung

jembidang hill district tem nung tayimtsü ajanga süidang pai photographs aser video clips aika agia lir ta Biren Singh-isa ashi.

Tenemkongtem nung nisung kanga maoba tesemtem nung ozüng alema poppy alu ayimba aika nguogo. Pa den külemi minister kari tawa tu helicopter tours senzüogo ta paisa ashi.

Imphal nung 53 buba Statehood Day sentong nung

poppy alu ayimer. Tekaratiba nung Manipur nungi poppy ajunga tera nungi atsüteta endoktsü ayongzüker" ta Manipur CM-i ashi. Manipur nung war on drugs campaign inyaka arudang Rs 80 crore jenjang alangba drugs raksa endokogo.

2017 nungi war on drugs campaign tenzük aser iba dak sendakba nung nisung aika pua tepuokdak yua lir ta paisa ashi.

Operation Praghat kübok Assam STF-i Jihadi nisung ka apu

Guwahati, January 21, 2025 (Agencies): Assam nung "Operation Praghat" kübok Special Task Force (STF)-i Islamic nunger ka puogo.

STF-i Dhubri district kübok Chinamari yimtsüng nung Ajibar Rahman (31) apu.

Rahman ya Berakata Sheikh'er jabaso lir aser Assam

nung jihadi maparen inyakba atema bushisüngdang aruba nung pa sendaktepa lir.

STF-i iba ken o atema nisung 13 tashi pua lir aser parnok rongnung Bangladeshi nunger densema lir.

Ansarullah Bangla Team tanishir Jasimuddin Rahmani den teyariteper tajung Md.

Farhan Israk tetuyuba kübok iba teloki maparen inyaka aru ta STF-i ashi.

Bangladeshi nunger Md. Sad Radi (Shab Sheikh) ta ser nisung ka Rajshahi, Bangladesh nungi India-i yok aser pa ya India kübok tesem balala nung "extremist ideology" sayutsü atema yokba liasü ta STF-isa bushitetogo.

CorCom-i Manipur nung R-Day 2025 mokdang

Imphal, January 21, 2025 (Agencies): Manipur nung ozüng agi noktanga aliba telungpur telok 6-i tentetba Coordination Committee (CorCom) ajanga Republic Day mokdangba metetdaksüogo.

January 26 anepdang 12:00 ako nungi nikongdang 6:00 tashi Republic Day 2025 benjung mokdangtsü ta parnoki ashi.

Public-i iba benjungmong nung shilem magitsü aser iba anogomong pusema shilem kecha magitsü ayongzüker ta CorCom-i Mongulbarnü metetdaksü.

Iba mokdang kübok medical, electricity, fire services, water supplies, aser tamangba yimsü dak sendakba sentongtem madener ta parnokisa ashi.

Manipur nung tensa mejungi lir aser iba ya "militarized state" ka ama lir. India sorkari intelligence agencies aser security forces amshia lisopurtem azüoka ayur, ta CorCom-isa ashi.

India sorkari "proxy insurgency" aser "false indoctrination" policy tem atonga inyaker aser lisopurtem tsüngda telemsa adokdaksür, ta parnokisa metetdaksü.

CorCom nung Kangleipak Communist Party (KCP), Kanglei Yawol Kanna Lup

(KYKL), Revolutionary Party of Kangleipak (PREPAK), Progressive faction (PREPAK-Pro), Revolutionary People's Front (RPF, People's Liberation Army- PLA), aser United National Liberation Front

(UNLF) teloktem dena lir aser parnoki Manipur linük balaka akümtsü akhanger. Hombarnü Socialist Revolutionary Party (SOREPA), Kangleipak-ia Manipur nung R Day 2025 mokdangba metetdaksüogo.



DIMAPUR BRANCH
Nyamo Lotha Road (Church Road)
Dimapur - 797112, Nagaland,
Email: dimapu@bankofbaroda.com

GARI TAYOKTSÜ LIR

YUNGMEI KONYAK nem Bank of Baroda, Dimapur Branch-i senotsü teyari agüja aliba vehicle/Equipment aser sentsüh mapetba ajanga gari sota ayuba tayoktsü lir.

Iba gari alitsü janrartemi tsüngtong arua gari asadangtsü aser gari indang osang tejangja agitsü atema ken o dak sendaka aliba ketdangtsür den tongteprateptetsü. Offer shiti den gari atema Earnest Money Deposit (EMD) ama sen **47,500/- (Rupees Forty Seven Thousand Five Hundred Only)** refundable/adjustable Banker's Cheque/DD benoktsüla. Gari alitsü tebilemba alirtem gari atema offer letter sealed envelope ka nung **"Quotation for purchase of vehicle No. NL-07/CC-6843"** aser teküboklen shisema aliba gari tenüng zülur ketdangtsür nem **24.02.2025** nü nikongtsütsü 4:00 ako tashi nungbo benoktsüla. Sealed quotations ya **24.02.2025** nü nikongtsütsü 5:00 ako nung Bank of Baroda, Dimapur Branch nung gari alitsü tebilemba aliba nisungtem matsüngdang lapoktsü.

Bid takok ngua asüri quotation lapokba anogo nungi tenzüker anogo 05 (pongu) tsüngda sen agütsütsüla mesüra Branch tekolakbai atakzütsüba mapang tashi nung benoktsüla, ajita mesüra pai deposit süa aliba EMD meyipä mangutsü aser garia yokadoktsü.

Vehicle/Equipment ya Bank-i latetja aliba jenjang dang nungi tekübokba nung mayoktsü.

Ken o dak sendakba nung tashi agüja aliba ketdangtsür ket nung kuli kecha magütsür offer tem agizüktsü mesüra magizüktsü atema tashi lir. Gari ya mapang inyakba anogotem nung Bank inyaksangshia aliba mapang asadangtetsü.

SL.No.	Vehicle Make and Description	Reserve Price
1	NISSAN MAGNITE MT XV (NL-07/CC-6843) Engine No.: B4DF424E051485 Chassis No.: MDHFBADD0P9108500 Year of Manufacture: 09/2023	Rs. 4,75,000/-

Date: 22.01.2025
Place: Dimapur

Branch Head
Bank of Baroda, Dimapur Branch

Indonesia anentsüh nung nisung 16 asü

Jakarta, Aenjeti/January 21 (Agencies): Indonesia kübok Central Java province nung anentsüh lendong nung nisung 16 asüba den nisung 10 yiruogo, ta sorkar ketdangsürtemi metetdaksü.

Tzünglu kanga sashia aruba sülen Pekalongan yimti nung anentsüh alua liasü, ta linük disaster mitigation agency otongdar kati ashi. Ketdangsürtemi maneni nisung asem samara aliba bushidar aser tzünglu ano anogo ishikabo arutsü imlar ta tekümdangtsü metetdaksüogo.

Local news outlet Kompas TV-i kitem kanga mejungu kongshir aliba aser ali agi anenbanger aliba sayuogo. Gari-a aika lishi agi nembanger aliba sayuogo.

Anentsüh agi lenmangtem raksatsüogo aser otongdari ashiba agi, anentsüh agi apua ana dak kongshiogo.

Pekalongan police tekolakba Doni Prakoso-i local broadcaster Metro TV dang ashiba agi, teküzmükertemi samara alir parnok pongu maneni bushidar.

Taliban-i US nunger ana chiokba sangdongogo

Kabul, Aenjeti/January 21 (Agencies): Afghanistan nung Taliban sorkari sangdong ka ajanga, United States den tepuokertem melenteptsü atema tenangzütepa yangluba nung America nunger kar chiokba metetdaksüogo.

Kabul nung amendaker aliba Taliban Foreign Ministry-i US nunger kwi chiok mesüra shibasa chiok iba indang osang tejangja magütsü, saka ashiba agi parnok ya Khan Mohammad den melentepego, shiba küm metsü tejakdang Afghanistan anütoklen Nangarhar province nung apu aser California nung tepuokdak ka nung taküm tepeyong atema puoker liasü.

"Islamic Emirate of Afghanistan aser United States of America na takok ngua sensak asema sülen Afghan Mujahid, Khan Mohammad shiba US nung tepuokdak yua liasü pa melena America nunger kar chioktsü asoshi mulungtepego," ta Afghan Foreign Ministry-i Mongolbarnü X ajanga metetdaksü.

GOVERNMENT OF NAGALAND HOME DEPARTMENT: POLICE 'B' BRANCH NEW SECTT KOHIMA - 797004

No. POL-B/SWR/ESTT/1/2/20(Pt)

Dated Kohima, the th Jan 2025

PRESS RELEASE/ADVERTISEMENT

Applications along with all the relevant documents are invited from Ex-servicemen-eligible retired Army, Navy and Air Force commissioned officers and personnel below officers rank (PBOR) so as to reach the undersigned by 7th March 2025 for re-employment against the following posts in the Directorate of Sainik Welfare & Resettlement, Nagaland and Zila Sainik Welfare Offices:

Ser No	Name of Post	No of post	Scale of Pay plus other allowances (Rs.) (Pay Matrix)	Requisite rank held in the Army or equivalent rank in Navy & Air Force
(a)	(b)	(c)	(d)	(f)
Class-I (Gazetted)				
(1)	Dy Director, Zila Sainik Welfare Office	02	Level 15	Col/Lt Col or equivalent ranks from Navy or Air Force(in case of non availability of retired officers mentioned,Maj or equivalent, may be appointed)
Class-III&IV (Non-Gazetted)				
(2)	Steno Grade-II	01	Level 10	JCO/HavCik (Steno) and their equivalent in the Navy and Air Force with proficiency in stenography and Staff Duties.
(3)	Head Asst	02	Level 10	JCO/HavCik and their equivalent in the Navy and Air force, conversant with Acts/Staff Duties will be given preference.
(4)	Accountant	01	Level 08	JCO/HavCik and their equivalent in the Navy and Air Force, conversant with the Acts/Staff Duties will be given preference.
(5)	Welfare Organizer	01	Level 07	JCO/NCO and their equivalent in the Navy and AIR force.
(6)	UDA	03	Level 07	JCO/HavCik and their equivalent in the Navy and Air Force, Conversant with the Accts/Staff Duties will be given preference.
(7)	LDA-Cum-Typist	04	Level 04	JCO/NCO Ck and their equivalent in the Navy and Air Force.
(8)	Office peon	05	Level - 1	JCO/NCO (Gen Duty) and their equivalent in the Navy and Air Force.
(9)	Sweeper-cum-Chowkidar	01	Level - 1	JCO/NCO (Gen Duty) and their equivalent in the Navy and Air Force

2. Specific rules Applicable


- In respect of Post No.1, the Ministry of Defence's letter F.No.22(5)/2013- D(Res-II) dated 13th August 2024 shall govern the service Rules/conditions in all matters.
 - In respect of Post No. 2 to9, the Directorate of Sainik Welfare & Resettlement Governm ent of Nagaland's letter No. HOME/SSA/881(Pt) dated 29 Feb' 2016 Shall govern the service rules/conditions in all matters.
- Reservation of Ex-servicemen:** All posts are reserved for Ex-servicemen who come under the definition as given in the official Notification.
 - Character of Antecedent.** They should have clean record of character and antecedent during and after service in Defence Forces and should not have been involved in any criminal case in any manner which should be certified to such effect in their application. Details/simple verification as the case may be, shall be done from both Civil and Defence authorities in respect of those candidates selected for appointment as per the existing instructions contained in the Govt of India, Ministry of Home Affairs, Dept of Personnel & Training vide O.M No. 18011/10(5)-Estt. (b) dt 23 Jul, 1987.
 - Age Limit**
 - Deputy Director/Class-1 post (Gazetted): Not more than 59 years of age.
 - Class-III & IV (Non-Gazetted Post): Not more than 50 years of age.

(a) 1st January 2025 will be the crucial date for reckoning the age eligibility of the applicants.
 - How to Apply**

Simple application in plain paper with following details/documents may be submitted to the undersigned so as to reach by 4 P.M on 7th March 2025:

 - No, Rank, Name, Regiment, present and permanent address.
 - Dates of enrolment/commission and retirement with reason.
 - Photocopy of release/discharge certificate/book.
 - Other requisite information specified in this Notification.
 - Bio data and all relevant documents.
 - For drawing up the panel of officers, candidates for Post No.1 are to register themselves with the Directorate General of Resettlement and ensure that their names are included in the panel for the vacancies prepared by KSB. Only the list of names that are sponsored by KendriyaSainik Board (KSB) and duly recommended by DGR shall be considered for the interview and subsequent appointment. For the Selection Board names of officers forwarded by KSB to State Govt (Home Dept) shall be included and eligible for appointment.
Enquiry regarding result of application will not be entertained and canvassing in any form will disqualify for empanelment.
 - Method of Selection**

Applications for Deputy Director post will be short listed and only eligible candidates approved by the KendriyaSainik Board, Ministry of Defence and the State Govt, will be empanelled and shall be called for interview for selection before the Selection Board constituted for RajyaSainik Board/Dte of Sainik Welfare & Resettlement, Nagaland and date and place to be decided by the State Govt. Such candidates are required to produce original documents at the time of interview (written and typing test for clerical posts will be conducted to assess the suitability for re-employment).
 - There is no reservation policy for officers and vacancies shall be released for all eligible and willing officers coming under definition of Ex-servicemen. For Grade C and D, local Ex-servicemen candidates shall be given preference.
 - Placement and appointment of the selected candidates shall be as per the requirements of the Directorate/RajyaSainik Board/ Home Dept. and appointment/placement may be in any of the District Offices.
 - Candidates who are computer qualified with typing ability shall be awarded preference.
 - No TA/DA is admissible for appearing the interview and Selection Board.


20.01.25

(KUKO MERO, NCS)

Secretary to the Government of Nagaland

Zverev, Sabalenka, Paula nunger semi-i iogo



Alexander Zverev



Aryna Sabalenka

AUSTRALIAN OPEN

Aenjeti/January 21, 2024 (Agencies): Mongolbarnü Australian Open tebur kija asaya nung Alexander Zverev-i Tommy Paul koka küm anabuba atonga iba asayamung semifinal tongtetogo.

World number two asayar yagi kanga meranga asaya America nunger asayar ya 7-6 (7/1), 7-6 (7/0), 2-6, 6-1 agi koka liasü.

Germany nunger asayar Zverev-i 2020 küma semifinal tonga asaya saka pa Dominic Thiem-i tsükdaktsü aser taoba küma semi nung Daniil

Medvedev-i tsükdakja liasü.

Kasa asayamung tetsür kija asaya nung Aryna Sabalenka-i Mongolbarnü quarter final asaya nung Russia tsür 27th seed Anastasia Pavlyuchenkova 6-2, 2-6, 6-3 agi kokogo. La taküm agi asemenbuba atonga iba asayamung akoktsü atema merangdar aser tang semifinal tongtetogo anungji iba nükjidong ataloktsü atema asaya ana dang akoktsü nüngdaker.

Belarus nungi world number one asayar ya semifinal nung Spain tsür Paula Badosa den asayatsü, shiba Coco Gauff straight sets nung kokogo.

Sabalenka, shibai Melbourne

Park nung asaya 19buba atonga kokogo, la Bresthostibarnü semifinal nung No. 11 seed Paula Badosa den asayatsü.

Sabalenka-i 2023 küm Melbourne Park nung mezüngbuba Grand Slam akok aser taoba küm January ita ano kasa asayamung tanabuba koka liasü. Lai taoba küm September ita U.S. Open-a kokogo aser tang tashi nung lai Grand Slam asem koka lir.

Australian Open küm asem atonga akokba asayar tatemangbubaji Martina Hingis lir aser tang Sabalenka-ia iba asayamung asemen atonga akoktsü merangdar.

Tetsür kija asaya nungsa Paula Badosa-i Mongolbarnü quarterfinal asaya kanga junga asayateta world number three Coco Gauff 7-5, 6-4 agi kokogo.

Badosa la indang career nung tang mezüngbuba Grand Slam ka nung semifinal tonogo. Spain tsürtem rongnungi Garbine Muguruza-i 2020 küm Melbourne nung semi tonga asayaba sülen tang lai semifinal ka tongtetogo.

[6:40 pm, 21/1/2025] Nukshi TY: Caption :

Phonetsholing, Bhutan nung asayatsü aliba International Sports and Games Tournament nung shilem agitsü atema All Nagaland Shaolin Kung-Fu Association, Nagaland team apusoa aoba mapang Dimapur Railway Station nung tangokba noksa nung angur. Iba asayamung ya January 21 nungi 23 tashi asayatsü. Nagaland team nung asayar 35 aser ketdangsür 5 lir. Iba asayamung atema India team nung asayar 187 lir.

Tuli marathon takok ngua asemogo



10buba Tuli marathon aser Inter-Ward open volleyball Tournament lapokba sentong nung Advisor Fisheries & Aquatic Resources, A. Panjung Jamir aser Tuli ADC Relise Sangtam na tangokba noksa nung angur.

Dimapur, Aenjeti/January 21 (TYO): 10buba Tuli marathon aser Inter-Ward open volleyball Tournament, Tuli Sub-division Administration, Mokokchung-i ayongzüka asayaogo.

Open marathon asemtepba ya ajak atema liasü aser asemtepertem rongnung tanobusangji arishi küm 9 liasü.

Tuli Marathon Race nung takok angurtem yamai alitsü:

Teburtem asemtepba Chuchangmeren Ao-i akok aser Taliyanger aser Sonu Rajbhar na tanabuba aser tasembuba jenjang nung liasü.

Tetsür asemtepba Songmo P-i akok aser Tsuchoi aser Sangmir na tanabuba aser tasembuba jenjang nung liasü.

Tetsür aser tebur asemtepba nung takok angurtem nem senpet sen 15,000/-, 7,000/- aser 5,000/- agüja liasü. Iba asayamung lapokba sentong nung Advisor Fisheries & Aquatic Resources, A. Panjung Jamir alakteta jaoker liasü aser pai asayar tem dang yimayimpong tajung benshia shisatsü temerek tenet tokteptsü ajungshi. Anogo ana asayatsü aliba asayamung ya January 22 nü tembangtsü.



Phonetsholing, Bhutan nung asayatsü aliba International Sports and Games Tournament nung shilem agitsü atema All Nagaland Shaolin Kung-Fu Association, Nagaland team apusoa aoba mapang Dimapur Railway Station nung tangokba noksa nung angur. Iba asayamung ya January 21 nungi 23 tashi asayatsü. Nagaland team nung asayar 35 aser ketdangsür 5 lir. Iba asayamung atema India team nung asayar 187 lir.

33buba NAYSA-D Meet 2025 tenzüktsü

Botsa, Aenjeti/January 21 (TYO): Northern Angami Youth & Sports Association (NAYSA) Group-D 33buba asayamung tanü Kohima district kübok Botsa & Tsiemekhuma Basa Ground nung tenzükogo.

Asayamung lapokba sentong nung Advisor for Transport & Technical Education Temjenmenba alakteta jaoker liasü.

Iba asayamung ya January 21 nü tenzük aser January 24 nü tashi asayatsü, kong yimtsüng 12 nungi tetsür aser tebur asayartem Football, Volleyball, Sepaktakraw aser athletics nung tokteptsü.

Asayamung lapokba sentong nung o jembiba mapang Advisor-i, 33buba NAYSA Meet ayongzüker tem aser shilem agirtem nem tenüngsang agütsü aser saisapong ajanga tetoktepba ajungketba dang masü saka iba asayamung nung shilem agiba

yimtsüng 12 longjemdaktsür ta ashi.

Paisa, saisapong ya lokti balala longjemdaktsütsü atema hadir tashi tait ka ta shia liasü.

Advisor-isa, asayamung nung shilem agirtem dang takokba tashi tajungtiba asayatsü ajungshiba den, akoktsüji tongtibang saka shilem agiba aser yimayimpong tajung benshia asayabaja kasa dang tongtibang lir, ta ashi.

Temjenmenba-i, Nagaland nung yimjung aser telongjem nüngdakba lemsatepba den lanurtem dang yimjung aser tesunep aser temaba jenjang tongtetba ambassadors kaka ama inyaksangshitsü ajungshia liasü.

Maneni pai, state tarutsü tajung aliba indang lemsatep aser ashiba agi, investor tem aikati Nagaland nung senotsü intoktsü jangraba lemsatepba indang metetdaktsü, koba ajanga nüburtem nem maongka

tasen agütsütsü, ta ashi.

Paisa, asayamung nung shilem agirtem dang takok ngua asayatsü imlaja ataba lemsatepba den ground telung aser tema nung takokba tashi tajungtiba agütsütsü merangtsü ajungshia liasü.

Asayamung lapokba sentong ya NAYSA-D General Secretary, Kezhangulie Kire lenisüba nung asaya aser Chiechama CRC Pastor Rev. Levi Rio-i Tsüngrem temaotsü meshizüka sarasadema liasü.

Sentong nungsa tir o Neikeso Zumu-i jembiba aser Neilakuonuo Metha-i ken tajung ka dena liasü.

2025 NAYSA-D Meet atema Tracksuits & Jerseys ya M/s Dziese Zumu Proprietor Dziese Zumu-i saya liasü.

Maneni Games & Sports Secretary Teiso-u Metha lenisüba nung asayamung nung shilem agirtem tenanzüktepba agia liasü.

CCSA general session mapang wrestling asaya

Kohima, Aenjeti/January 21 (TYO): 56buba Centre Chakhesang Sports Association (CCSA) General Session tenzükter tanabuba anogo wrestling asayaogo. Iba asayamung ya Sakraba Youth Organization-i ayongzüka Sakraba yimtsüng nung tang tasayadak lir.

Wrestling asaya ya Sakraba yimtsüng kübok Thürinye-küde tesem nung asaya aser Rising Youth, RPP Phek District tir Kulupoyi V. Vadeo alakteta jaoker liasü.

Sentong nung o jembiba mapang Vadeo-i wrestlers tem dang, anema toktsüba, alirongsen aser shisatsü

agütsüba atema tulusang Tsüngrem nem tenüngsang agütsütsü ajungshi.

Tir-isa, asayar tem dang parnok health, physical power aser tashi ya lokti anema inyaksangshitsü atema mamshitsü ajungshi. Iba melena pai parnok sempet ya tulusang Tsüngrem tushitsü atema amshia iba lokti temaba jenjangi ajungkettsü ajungshia liasü.

Tebur 28 aser tetsür 18 densema wrestlers 46-i iba asayamung nung shilem agiogo. 56buba Centre Chakhesang Sports Association (CCSA) General Session ya January 25 nü tashi agitsü.

BILEMDANGANG

"Tangar mapa inyakba repranga kazüba agi nü aya manentsü."